

Finansijska revizija otkrila zloupotrebe, korupciju i utaju poreza unutar SDS-a

OHR je danas objavio izvještaj o finansijskoj reviziji Srpske demokratske stranke koju je proveo specijalni revizor.

Reagirajući na ono što je ustanovio specijalni revizor, visoki predstavnik je izjavio: "Ova revizija otkriva detalje o zloupotrebi, korupciji i utaji poreza na svim nivoima stranke SDS. Uočeno je potpuno, čak nezakonito nepostojanje odgovarajuće kontrole čija bi svrha bila da osigura poštivanje zakona i da spriječi protok finansijskih sredstava ka, i od kriminalnih mreža i mreža ratnih zločinaca, te struktura koje im pružaju pomoć; finansijska revizija također otkriva značajne dokaze o nezakonitim transakcijama SDS ogranaka u preduzećima i javnim tijelima, i vrlo očigledno, jasne naznake kontinuiranih, višestrukih i flagrantnih kršenja izbornog zakona."

Ured specijalnog revizora je posjetio 16 općina u kojima je SDS na vlasti u sklopu ove revizije, koja se vodila tokom više sedmica.

Isto tako finansijska revizija je otkrila:

- sistematske nedosljednosti u računovodstvu
- umanjeno prikazivanje rashoda, imovine, i donacija
- nepotpune spiskove članova (kršeći vlastite stranačke Statute)
- neplaćanje socijalnih i drugih doprinosa za svoje zaposlenike
- besplatno korištenje općinske imovine od strane SDS-a
- račune koje SDS nije platio javnim preduzećima

Komentirajući mjere koje je jučer poduzeo, visoki predstavnik

je izjavio "Iz ove revizije je jasno da ne možemo biti sigurni da stranka i dalje ne pruža finansijsku pomoć svom osnivaču optuženom za ratne zločine, Radovanu Karadžiću. Veze ove stranke sa kriminalnim aktivnostima i ratnim zločincima se moraju zauvijek raskinuti, a novo rukovodstvo mora otpočeti zadatak sređivanja stanja u stranci koju prožima korupcija i koja je zbog toga korumpirala institucije RS. U skladu sa odlukama koje sam jučer donio, sada imaju priliku da to urade. Nadam se da će iskoristiti tu priliku"

Podaci iz izvještaja koji ukazuju na kriminalne radnje, ili na finansijske veze između SDS-a i ekstremističkih grupa bit će proslijeđeni tužiocima.